



UPM Jalin Pengembangan Pertanian Bersama RISDA



Naib Canselor UPM, Prof. Datuk Dr. Nik Mustapha R. Abdullah (kiri) bertukar dokumen dengan Ketua Pengarah RISDA, Dato' Mohammad Izat Hassan disaksikan oleh Pengerusi RISDA, Tan Sri Rahim Tamby Chik (tengah).

KUALA LUMPUR, 9 Mac– Universiti Putra Malaysia (UPM) menjalinkan kerjasama dengan Pihak Berkuasa Kemajuan Pekebun Kecil Perusahaan Getah (RISDA) untuk membangunkan sektor pertanian melalui penyelidikan, pengajaran dan pembelajaran serta perkhidmatan profesional.

Naib Canselor UPM, Prof. Datuk Dr. Nik Mustapha R. Abdullah berkata kerjasama itu membolehkan pelajar dan pengajar universiti berkongsi ilmu pertanian bersama RISDA bagi pengemudi sektor pekebun kecil.

Beliau berkata kedua belah pihak akan berkongsi hasil penyelidikan, kepakaran, pengalaman, teknologi, penggunaan kemudahan pembangunan modal insan, penyelidikan dan pembangunan komoditi dan produk.

“Sebagai sebuah universiti yang mempunyai kekuatan dalam bidang pertanian, kerjasama ini dapat membantu RISDA membangunkan taraf sosio ekonomi pekebun kecil dan menjadikan getah sebagai tanaman strategik.”

“Dengan termeterai memorandum ini diharapkan pelajar pertanian menjalani latihan amali secara efektif bagi membangunkan sektor itu dan pembangunan keusahawanan,” katanya pada majlis menandatangani MoU antara RISDA dengan UPM di sini.

Sementara itu, Pengerusi RISDA, Tan Sri Rahim Tamby Chik berkata RISDA melalui Kolej RISDA telah menandatangani MoU dengan UPM bagi program berkembar dalam pengajian Diploma Pertanian, Diploma Pengurusan Perniagaan dan Diploma Sains Komputer.



Katanya persefahaman itu akan memperkukuhkan lagi aktiviti pembangunan sektor pertanian yang merupakan nadi bagi agensi yang menerajui kemajuan pekebun kecil di negara ini.

"Saya percaya dengan jalinan kerjasama ini akan memberi manfaat kepada RISDA dan UPM. Selain itu, kepakaran yang sedia ada di UPM sangat berharga dan perlu dipraktikkan oleh pegawai RISDA untuk mengukuhkan lagi perkembangan bidang pertanian," katanya.



Antara tetamu terhormat yang hadir.

**Berita ini disediakan oleh Seksyen Media, Bahagian Komunikasi Korporat UPM.
(Noor Eszereen Juferi, 03-89466013).**